

摘藻堂四庫全書薈要

集部

欽定四庫全書薈要

集部

御選明詩卷十七

詳校官原任主事

臣

李斯咏

欽定四庫全書薈要卷一萬八千五百十七

集部

御選明詩卷十七

五言古詩二

楊基

感懷

璞玉宜深藏白雪乃寡和
和寡非所悲銜玉徒取禍
奈何則足者抱璞不知過
進非烈士忠退恥愚夫懦
傭姦匪利直販鬻欲自浣
山中一尺雪且復掩扉卧



鄧禹南陽來仗策歸光武孔明卧隆中不即事先主英雄各有見何必問出處孫曹與更始未可同日語向非昭烈賢三顧猶未許君子當識時守身如處女

位卑諫勿直直諫君心疑交淺言勿深深言友誼虧謬謬衆所惡況復違逆之豈不利於行吐蘗而含飴朝登千仞岡振我身上衣丈夫貴自潔毋論他人非

一女不得織三人歎無衣一夫不暇耕八口皆啼飢飢寒迫於身誰能不為非西伯善養老仁人為己歸霜寒

草木落禽鳥相背飛民心亦何求在於得所依此理勿
暫失君子慎其微

鵲巢知避歲終為鳩所居巧者勞不足拙者安有餘溪
翁夜結網山人朝煮魚隆準入關中不讀半卷書當時
微張韓乃與勝廣俱大拙乃至巧巧者復何如

驛驢日千里亦在御者功向無造父能乃與凡馬同韓
彭更駕材驅策遇沛公增本渥洼兒意不與項通豈獨
知馬難所貴御馬工駕御苟失宜鮮不敗乃翁蕭蕭帳

下驢千駟何足雄

陳平

陳平素無行終為漢相國陰謀固可鄙奇計凡六出後
來諸呂難卒賴陸賈力豈緣富且貴臨事意反詘智者
猶若斯請為愚者說

秋夜言懷

鮮鮮籬邊菊撼撼庭下蕙蕙氣日已銷黃花自妍麗復
恐清商激幽芳亦凋瘁褰衣步廣除露白月在地鵲飛

林影空蟲語牆陰細昔賢悲絲染往聖歎川逝少壯不
我留臨風發長喟雅志諒難酬蹉跎老將至

西齋近寒迳枯葦接深篠秋風颯然至索索鳴不了拋
書坐孤榻眼澀燈暈繞窗破斜隙明漏斷餘更悄平生
所欣遇此夕紛內擾假寐入冥思南枝有歸鳥

雨中效韋體寄道衍

叢林翳重岡迢遞僧居獨憑軒一悵望春雨靡蕪綠泉
香花落磴窗暝松圍屋憶爾諷經餘袈裟坐深竹

初夏過寧真道院

偶來高樹下獨坐青苔石澗雨落餘霏衣裳淡生碧道
因微物悟理向玄言析習靜自無營何妨處囂寂

賦得山逐放舟遲送王主簿

舟行山亦移山靜舟亦住青山無故人行入自來去初
辭逶迤谷復接參差樹杪轉暮色分帆駛秋嵐度俄停
風暫弱既遠煙重護別意即山情依君屢回顧

觀魚

池陰樹影涼白小紛成隊吹絮圓漚續觸荷清露碎俄
沈靜却浮忽遇驚還退幸免釣絲憂江鱸且充鱠

賦得萍贈陳久中

浮蹤散寒星一夕生無數魚跳翠乍開漚過青還聚微
風和影去急雨連根露惆悵別君時楊花滿衣絮

李迪病目醫令止酒因作此勸之

病目須飲酒飲酒調微疴氣血鬱不舒賴此酒力和所
以雷公方製藥用酒多活血必酒洗散鬱須酒磨製藥

既用酒飲酒良匪他酒可引經絡酒能驅病魔病目不
飲酒此蓋醫者謫李白好痛飲不聞目有瘳子夏與丘
明不為飲酒過飲酒既無害不飲如俗何清晨呼東家
買置數斗醪爛醉瞑目坐滿面春風醺陶然物我忘夢
見孔與軻此藥豈不佳而乃止酒那我今勸君飲君意
無嫌媿庸醫或見責請示眉菴歌

送方以亨還吳興

并序

以亨來洪都省兄以常予因與之遊者累月既而

將還吳興其兄錄所贈詩見示余喜而作三章以
餞之

草有不可偃木有不可彫人心非秋蓬安得隨風飄
憐君玉雪姿明月當清宵葳蕤紫荊花輝映非一朝
噤噤寒江鴈去去誰能招

遠別腸欲斷近別淚滿纓交遊無不然而況弟與兄
荒塗霜露繁哀角響故城去傷骨月思住感鄉里情
還家及東作翳翳桑麻成

賢女失之陋壯夫失之貧相逢無所遺慷慨不得伸臨
歧歌短章所道皆苦辛淮陰未去楚江總復仕陳聊沽
客中酒用酌還鄉人

發南浦

開船別西山迤邐向南浦帆輕去自速初不用篙櫓蒼
蒼煙中樹索索響斤斧一女沙上汲衆漁洲畔語我行
歲云晏況復遠儔侶回首北歸鴻翩翩下寒渚

夜過市汊驛時酒醒月出有懷幕中諸友

驛樓枕迴洲湍汊聲活活霜蘆花猶泛煙柳葉漸脫月
出鳬鴈鳴孤榜寒江闊酒緣風力退詩苦真景奪何處
寄相思浮雲楚天末

過小孤

大孤俯如盤小孤儼而立羣山如從使左右相拱揖孤
根屹撐拄萬竅爭噴噏瀏瀏陰風旋慘慘元氣濕江流
亘其下震怒莫敢吸洑為盤渦深馳作奔馬急躋攀或
失手一蹶不可及我來值秋晚木落衆鳥集勿焚夜船

犀蛟人抱珠泣

望南岳

我從匡廬來但覺諸山低嵯峨望衡岳雲霄與之齊下有赤蛇蟄上有朱雀棲仰瞻祝融拔俯揖紫蓋迷五嶺皆培塿三江為涔蹄巍然南服尊嵩霍相提攜封秩崇君稱諸神咸朝濟丹書篆寶冊萬古封金泥百王重祀典赤纁藉王圭自非精靈通牲帛勞焚齋余方向遠道無由陟層梯蒼蒼煙霞中喔喔聞天雞緬思昌黎伯恭

默開雲霓靈貺自昭格誠敬良可稽斯人久云沒感念
徒含悽

湘江道中思常宗

暮江散微雨風定波自碧一鷺立不飛雙鴻遞相直餘
煙菱女唱新月漁郎笛此處忽懷人相思杳何極

湘竹有題

朝行湘竹下暮宿湘竹中雲情與雨態萬變俄不同密
密深翳日疎疎細含風新梢露裊裊老節煙濛濛紛如

千靈妃從以萬青童播幢列縹緲環珮搖丁東來從蔚
藍天步入東華宮悵望不可即翩然若驚鴻天矯喜而
笑低回俯乃恭質堅本外直性潔緣中空籀爾中弦矢
揉之可彤弓冰雪擔不易肯與時污隆今朝揭春晴更
覺翠色濃戢戢琅玕叢忽見桃花紅直疑路不遠便與
桃源通我欲捐輕舟褰衣入崆峒春禽迎我啼音響諧
絲桐終當聽山雨自號蒼簑翁

瀟湘八景

山市晴嵐

靄靄復霏霏，橫霄曳夕暉。
巴人與湘女，相逐買鹽歸。
回望墟煙處，蒼茫隔翠微。

漁村夕照

今朝罷漁早，挂網堤邊樹。
雲斷一峯青，斜陽在坳處。
癡兒晚睡醒，却訝東方曙。

煙寺晚鐘

孤塔望中青，鐘聲隔洞庭。
蒼山不可及，煙闊浪冥冥。
憶

似寒山寺楓橋半夜聽

江天暮雪

風攬瑞花晚江寒波欲凝凍僵業漁者歸載一船冰一
白迷沙渚柴扉認有燈

遠浦歸航

輕帆挂春風倒影湘江綠天低浦溆遠歸向誰家宿遙
指落花西黃陵廟前屋

平沙落鴈

江橫秋水白日落寒沙淺鴻鴈萬里來翩翩下平遠欲
隋更低飛斜行兩三轉

瀟湘夜雨

風急雨浪浪孤舟夜正長江湖隨處惡何況是瀟湘今
夜殘燈裏無人不斷腸

洞庭秋月

湘水秋更清湘月秋更白光輝一相蕩水月不辨色何
處洞簫聲巴陵夜歸客

舟中聞春禽寄江陰包鶴洲

山中無音樂絲竹在禽鳥
嚶嚶呼春晴嚶嚶報春曉
嬌吟與柔嘒圓滑鬪新巧
知君在山中樂此長不少
疎籬密竹外深澗綠樹表
青鞋踏花影信步聽未了
歸去聞箏聲應怪銀甲小
我來行一月風雨春江渺
今朝豁晴霽孤琴破幽悄
鏗如女媧笙忽作餘音嫋
平生黃鐘耳直欲辨分秒
萬事付松風翛然坐秋草

張羽

雜詩

后皇有嘉樹受命生南國
謬承雨露恩結根非一日
如何游閒子攀條摘其實
一摘已自傷況乃再三摘
清霜凋綠葉榮枯良未測

泠泠山下泉汨汨谷中源
中有雙鯉魚浮游戲波瀾
江漢豈不深欲往道無緣
風雲諒難遇棲棲守故淵
但恐勺水枯終為漁者憐
感此令人悲置身良獨難

生平慕遊俠驅馬適東周
周人重千金所遇非我儔
撫

劒登太山歷覽魯與鄒小儒事絃歌齷齪安足留北臨
邯鄲道平原曠悠悠嘗聞虞卿賢斯人不可求悲哉窮
途士緩急將焉投

擬古

間夜會親友置酒臨高堂秦箏間趙舞吹笙復鼓簧清
音隨飄風逸響繞修梁坐客咸同志寧復算羽觴人生
忽如寄富貴安可常含情待所歡渺渺天一方譬彼鵲
鳴鳥揚聲待朝陽憂思怨零雨白日何時光且當極歡

宴聊以慰中腸

雜言

并序

予屏處間默久絕篇章維時新春偶感歲月慨然
興言既復自課成帙輒書以見襟抱隨事為篇雜
出無倫故云

青陽萌始節萬物咸光昭我亦動新懷晞沐起晨朝俯
覽手中鏡仰看枝上條枯卉有再榮華髮行已焦總角
服遺訓老大望逾遙不傷華髮衰但恐志業消學成在

永久期之於後凋

此邦非吾土寄跡聊在茲旅食何所營亦復假耘耔
冬苦霖潦良苗奄離披至今畝澮間餘波渺相圍行恐
春澤盛耕墾失其時共虞斯人難豈獨念吾私先師有
遺言耕也有時饑且當竭所務天道非我知

生平頗愛酒未嘗自斟酌一與佳賓遇陶然不復却雖
得一醉歡傷生莫能覺況復多謬忘空為俗所薄靜言
思利己一止良不惡東隣有父老顧我忽大噓與子共

禿翁忍棄手中爵酒為榮衛楨多憂正相搏呼兒漉新
釀且復共酬酢醉罷各相恕誰誠責狂藥

青青女貞樹霜霰不改柯托根一失所罹此霖潦多高
枝委為薪落葉掩庭阿弱柳對門植秀色一何佳物情
固有常變幻其奈何

伯鸞舂吳市伉儷乃相之布衣日操作椎結無容輝居
貧敢忘敬舉案與眉齊斯人亦何修感彼糟糠妻買臣
躬負薪室家請長辭豈惟匹婦醜君子諒有虧周道興

閨房衽席詎為微所以卻缺耨重耳任不疑斯道久寂寞
寔据撫為此詩

抱拙衡門下久已忘鳴琴凝塵翳其徽絃絕調亦沈時
還置我膝命酒聊自斟高歌出金石拂拭趣已深酣來
枕之卧冥此千古心吾亦忘吾形何事待知音

春日陪諸公往戴山眺集暮入北麓得石牀巖
洞諸勝

張宴凌崇巔返策憩澗陰南岑夙厭歷北麓今始臨危

磴絕來術崩壑瞰空潭幽竇抱虛白哀牝遞清音傍探
闔窈窕側坐倚嶇嶸古苔紋已駁春蒲茸漸深幽禽語
相續驚麕竄莫尋扳蘿冒修袂折蘭芳素襟奇蹤閱自
古勝賞發予心雖微舞雩詠敢諧溱洧吟山河永襟帶
微生終陸沈愧乏古人操將何視來今

春初遊戴山

雲羅橫四海田野無遺英尚賴二三子共怡山水情煦
煦新陽動寥寥天宇清昔人稱四美茲晨遂成并前登

高丘阻遙睇澄湖明憑林招遠風松檜自成聲俛仰天地間微軀良不輕安能自羈束坐使衆累縈處賤足為貴抱素詎非榮逍遙解神慮庶以適吾生

山中送陳維寅

春山有佳趣累日同遊寓我為采薪畱君先拂衣去竹翠落閒階鶯聲出高樹空館愁獨歸依然攜手處

春晝

人間白日靜鳥鳴高枕餘薜蘿引修蔓綠覆茅簷虛砌

筠初過雨窗風時弄書已無車馬跡適似田家廬於焉
何足戀性自樂幽居

雨中試筆

門徑素來靜雨中人更稀山禽時一轉田雉每雙飛客
散罷琴讌心閒清道機南山有佳色相對共依依

晚涼放舟

徂暑驚節謝幽煩倦日永翫舟秉夕涼沿渚入煙境靄
靄殘陽飛沈沈綠陰靜蒼茫水容寂照見歸禽影開襟

招遠風延目認遐嶺偶遊非素期炎氛聊暫屏守拙寡
世用尋幽得澄景清賞猶未愜孤舟當重整

始聞早砧

寂寂秋景晏蕭蕭涼吹生閨人感寒至一軫遠人情嘹
亮清砧動紆徐搗杵鳴微茫帶煙遠蕭疎出林輕此時
離居客單眠夢亦驚披衣一惆悵斜月滿山城

秋陰遠望

重陰生夕霏陰靄紛如霧乍睹餘霞景已失前山處氛

氤迷去鳥杳眇沈疎樹望遠一淒然徘徊獨歸路

月夜舟行入金山

在吳中

夙志羨山水塵縈久未遑名峯久在望茲辰一來翔揚
舩入南渚夕氣候蒼蒼紆直水無極沿洄路更長皓月
懸高天廣川散飛霜夜寒人語清煙霏繞迴塘歸樵遞
谷響驚鳥動林光愛此塵境遠敢畏露霑裳

戴山石上聽松

溷耳俗喧久茲晨一清聽長松遞解飈哀壑互相應奔

騰駭濤瀨窈眇韻笙磬至音不假器始覺自然勝緣觸
故成聲動極還歸靜此時憩石坐默然待其定乃知棄
瓢者未悟聞中性

曉起

新寒人獨卧寢扉風自開向無羈旅念秋思亦佳哉曙
禽翻暗竹白露瀉青苔欲賦幽居意對景每難裁

寄中竺泐季潭

師從鍾山來遺我故人書一入白雲去相思秋雨餘徒

慙塵土跡來擬竹林居遙想中峯月清梵滿空虛

碧瀾堂

藹藹層城陰瀾瀾溪流漫問誰所構堂軒窗傍高岸
蒼云唐刺史文采當時冠華筵勢獨高賓佐俱才彥
吹簫橫落日畫鷁如雲散健兒簸旌旗水戰逞奇玩
臨流賦新詩意氣共稱歎烽火幾荒殘城郭多遷換
歌聲久矣滅郵亭鎖溪畔臺傾鳥雀下闌壞鳬鷺亂
惟餘南山青依然眼中見

白蘋洲

層城鬱迢迢長溪貫雙流喧然闌闌中乃有白蘋洲
晨策杖往秀色散我憂宵渺蛟龍窟澄明鷗鷺秋
開花照白日接葉暗漁舟涼風起其末客衣薄颼颼
我欲攜童穉具此雙釣鉤高歌綠水曲散髮洲上頭
安能隨世人負我平生遊

過雲巖

在虎丘寺

逶迤度前峯到寺行屢歇齋庖竹外煙汲路松間雪
覩

水悟真源聞香解禪悅欲共老僧言相對還無說

懷景佺師

旅宿厭煩喧愛此僧居靜蓮宇已摧頽茅齋自清迴山
光林際來野色雨中淨池水不生瀾袈裟坐相映累日
滯幽尋綠苔應滿迳

舟中

朝發戴山岑夕逗金溪瀆雲天方慘栗川途屢迴復颿
駛岸疑轉棹奔山似逐鷗鳥隨波泛霜漸孕苔綠依依

浣女影嫋嫋榜人曲采奇忘來久耽勝成往速悅生良
可懷狗名非所欲請試孺子歌去矣從我獨

山中荅武康徐高士寄書

久別得君書開緘散吾慮不寄山僧來何由知我處剪
紙荅君書還寄山僧去為問片雲間何時一相遇

舟中望佛燈院懷南澗

蕩舟西陂上望山懷遠公遙知覆衲卧雪屋一燈紅事
殊迹暫曠神交理自通維當待歲杪期子白雲中

擬過園隱阻雨

在遠每傷離在近還成隔飛雨渺無涯佳期悵難得人
寒市井空天晚江潮白知君掩閣卧終朝遲來客

讀書圖

幽棲出塵表脩翠連松竹袖得碧苔篇閒來石上讀日
暝欲忘還山空人轉獨

楚江清遠圖為沈倫畫并寓九曲山房作四首
煙霏亂晴旭遙見西林山憶歸東湖遠人家春樹間荆

扉映水掩應待龐公還

潮落寒沙廣蒼然遠山暮何處
吾師歸自識門前樹披
圖憶所歷彷彿松滋渡

猿啼楚山晚雲生冒洲渚
返照入澄江風吹半峯雨中
有遠行舟悠悠待徒侶

寒煙引輕素斜日在高峯
但聞猿鳥響更無塵土蹤
山僧暝投寺迢遞來清鐘

松下曉櫛

凌晨盥漱罷獨步南階行悄然四鄰寂暫此息營營散
髮綠陰下一櫛晨風清彈冠塵自散振衣香更輕松露
空中墜荷氣靜時生悟脫遂真性俛仰忘憂情

元日喜雪懷方員外以常

片片逐年來皎色映樓臺墜花驚爆竹落素濕香梅遶
林春宴罷撲馬早朝回應知洛中客高扉徒自開

春山瑞靄圖

鶯啼山雨歇前川綠正繁人家在深樹雞犬晝無喧澹

澹流水意依依田父言謾鼓木蘭楫往溯桃花源即此
堪結廬可以傲華軒

娟淨軒

綠竹有異質夙著風人篇猗猗瞻淇隈籊籊懷衛泉拾
遺美形容復有娟淨言微植被獎師麗句永流傳若人
同所尚掇辭以名軒攢玉矗森爽編翠鬱芊綿鮮標貫
寒日密葉冒清漣遙想佳雨餘靜對罷鳴絃濡翰傳霜
節搦管題春妍聊探詞詠妙默寄圖繪宣逝將汎濤江

息駕依名園攀枝埽涼月
憩陰濯寒煙雖微求羊高請
附嵇阮賢緘詩附所愛纏繫日為年

倪雲林畫

南枝有高士乃在延陵東
清時不肯仕滅跡雲林中
拂石坐蘿月絃琴寫松風
焚香誦黃庭望雲送歸鴻
門車常自滿尊酒無時空
乘興畫滄洲古人未為工
干戈攘末路白首隨飛蓬
名山乖始願羈遊無所終
賴有車武子能哀阮籍窮
傾壺醉陶令辟堂延蓋公
流俗輕高賢

貧賤困豪雄孤鳳混雞羣野鶴摧樊籠豈乏梁伯鸞不
聞皋伯通吾將傳遺逸清芬千載同

紀行十首洪武七年甲寅臘月奉旨乘驛往鳳
陽祭皇陵道經目覽爰筆舟中用紀其實

錄六首

龍江灣

玄天無烈風江水日夜清馳波渺東注迴流抱神京至
哉鍾水德乃以龍為名舟檣萬方合雄麗殊百城昔云
天塹險今作衣帶縈山川跡不改人理有代更下馬入

官船茲馬始孤征
祀事有常期
中心念王程
俯視萬仞淵
不啻溝澮平
涉川古所戒
事重軀命輕

觀音山

連山爭南馳
劃斷滄江曲
勢如萬馬奔
鞭韁忽迴復
石角不戴土
蒼然四無麓
寸草不得榮
唯合古苔綠
浪波撞其根
巖竇響琴筑
浮圖乃善幻
凌虛駕佛屋
行人願利涉
望拜各致祝
人生貴無事
安能慮存覆
我欲升其巔
憑高快心目
飛傳不可畱
一往如電速

竹篠潭

凍雨不成雪客行利新晴迴睇三山外殘陽靄餘明江
神不揚波歸流澹且平使者誠寡德國家育威靈笳鼓
發中州櫂歌悲且清醜酒凌長風篇翰倏已成常讀皇
華章征夫任匪輕愧無咨詢効何以荅聖情

金川門

兩山夾滄江拍浮若無根利石倂劒戟風濤相吐吞維
天設巨險為今國東門試將一卒守堅若萬馬屯我來

犯清曉天空霜露繁列宿森在列北斗峭可援江光合
海氣溟滓神攸存俯視不敢唾中有蛟龍蟠浮圖者誰
子高居凌風搖下見渡口人擾擾蜂蟻喧愧彼超世士
去去將何言

清口

豁達兩河口前與黃河通高岸忽斗折清淮匯其中甘
羅城在南韓信城在東一為秦人英一為漢家雄人生
有不死所貴在立功方其未遇時鹿鹿何異同時命苟

未會丈夫有固窮舍舟登高防歲暮百草空坡陀隴畝
間一二老弱翁遺跡不可問但見荒榛叢行行重回首
目斷雙飛鴻

三江口望京關

凋年赴陵邑穉景懷京關引領鳩鵲觀言旋桃李月綠
蕪滿芳甸青山麗佳節沙氣已含春柳意方辭雪征夫
雖邇近同心仍阻絕逃空庶無遺賞勝聊自悅吾其和
天倪將從莊生說

徐賁

八月十五夜飲王擴相川別業得動字

風高海雲收月出天宇空今日寒暑均適與諸君共歡
深坐忘永契合飲易痛露螢寒不飛水鳥夜停啼山精
各潛匿銀蟾忽飛動亭亭廣寒桂不知何年種我欲問
嫦娥素鸞無由控佳節屢變更壯心久慳恫人生非仙
骨有樂當自縱惜無桓伊笛為爾作三弄

過荷葉浦

粼粼水溶春淡淡煙銷午不見唱歌人空來荷葉浦無
處寄相思停舟采芳杜

題陳允中山居圖

昔年為客處看圖懷故山今日還山住儼然圖畫間泉
來遶蘭逕月出對花關應知農事畢高坐有餘閒

池上晚立

芳草湛微漣高柳駐餘景喧喧林鳥繁藹藹墟煙迴幽
情卒難愜因茲立餞頃

行上人蕭然齋

高林灑繁露，閒齋自蕭然。
俄聞一葉墜，應我琴中絃。
野水寒欲淺，遙岑秋更妍。
清晨理梵罷，窗扉靄餘煙。

獅子林竹下偶詠

客來竹林下，時聞澗中琴。
經房在幽竹，庭戶皆春陰。
孤吟遂忘返，煙景生逾深。

晚步

雨餘夏氣清，煙聚園齋暮。
紅萱宿困蜨，綠橘垂新蠹。
艷

情杯裏融幽意琴中度蕭散且未寢遂適前庭趣

尹明府吳越兩山亭

長江接海門一水限吳越兩山鬱相對峰巒各羅列勁
勢爭吐吞蒸嵐互出沒尹君好游觀結亭山水窟闌干
出層巔細路縈百折崩石絡垂蘿老樹著棲鶻平生登
臨興盡為山水發不知嘗膽人此地幾征伐至今兩山
雲來往似奔突嗟余客江海所歷多奇絕何當上斯亭
長歌弔遺烈

簷簷軒

小軒閤幽寂迴闌碧筠護寒色晴裊池垂梢晚縈露陰
凝訝煙積籟起知颺度瑟瑟含夕清蕭蕭澹秋素不有
虛心人何由同歲暮

種菊

蕭條齋舍前隙地頗高爽茲焉倦耘鋤而乃成廢壤邇
來學種菊始為驅草莽掩冉籬落間枝葉紛以長雖煩
灌溉勤亦藉雨露養秋香固所悅晚節益可仰匪曰表

隱名聊以備幽賞

菜藟為永嘉余唐卿右司賦

遠辭華蓋居來卜山陰宅乍到俗未諳久住地旋闢屋
廬尚樸純楹桷謝雕飾高營踞山跗深甃逗泉脈檐將
狼尾苫門用鼠筩織缺垣唯補蘿圯砌總蒙藟編籬限
邇鄰封枿表殊場本來是野性豈是耽地僻學圃欲擬
樊為功敢侔稷寧惜勞外形自甘食餘力耕鋤限兒課
灌溉當僕役破塊何昉昉陳器亦畧畧駕許俗士回屐

向鄰翁惜筐筥織湘材鋤鍤鑄棠液卓鑣鷹背利負囊
蝟毛磔俯仰疲桔槔沾灑漬襁褓循畦行策蹇偃林卧
敲石鑱披欲芟丘刈削竟驅磔值阜即為坡遇凹就成
洫堤崩防密葭竇隙拒亂棘地同農畝計區學井田畫
長畛縱復橫曲渠廣還窄接流引餘清疏沼匯深碧架
桁秋實垂籬落夏蔓羃雨露加膏腴糞土發硤瘠識種
題裏藏辨類分行植時法常按譜候時即看厯蕨芽拳
握紫薑蘗拇駢赤兩合憐薊葦叢生愛鉞芑初菰迸蟄

雷新臺長春較雀弁荒葉峨馬帚并莖直黃繁微猋綿
瓠老枯辦拆芍苗卷龍鬚藥幹擁牛膝黃獨雪晴收紫
蓼露晞摘陰階茂蕨荒下田豐菲蔥卷輪木耳垂攢刺
菱角射秋茄采更稀夜韭剪仍殖芝芳凝海瓊交鬱點
池墨枸杞香可醪竹茹熟堪腊石皮被柔薄土酥膾肥
酌細蓴入饌鱸鮮羹雜羹鯽茶苦槩與儔松脆冰為敵
茵蘆西蜀致苜蓿大宛得長縈苻帶沉亂簇陳絲繹片
效野人獻瓜為天子副決明纔一方蒿苴連數席瑯縠

慰渴心王延起羸疾葷毒笑非喜芥辛泣詎戚盤根芋
埋壤脫穎笋穿壁擷香憐雞蘇折甘嗜燕麥粟腐切方
圭乳餅斲圓壁孕子梭受剗贅聃石被馘兔目淘夏槐
鹿角毛臘炙菁託諸葛呼巢以元修斥

諸葛元修
二菜名

覓褒

蔡守清薇怨周卽逆邪蒿義所攘穢妄理堪啞薄利嘉
拔葵省謗惡遺蕙窮餐齏酸黃儉啖薤留白閑情付田
園生意仰膏澤莢齊翠疑剪甲坼綠訝擘掩冉煙際姿
蔥蒨雨餘色始掇惜滓染載滌畏蟲螫新薦或在籩薄

湘亦須臾求久漸投醪致爽遽沃醢不煩僚友送敬向
先聖釋對屠誇大嚼燕客忻小摘拌羞不過三甕菹當
飫百未能著蔬經安敢踰食籍旨蓄足山廚素供過香
積用茲卒歲年庶得勤朝夕賓魏徐見厭厄陳顏自懌
潔菴士恥汙造橋盜懷恤抱甕忿設機授書誚求益

用侯

君房微
嚴光事

縱馬因致憂吞蛭遂亡謫萬錢柳復乞片金華

還擲仕知呂姪安居味鄭人識枕肱仲尼樂傷指范宣
阮昺臠固云嘉食單亦足適敷淡分所安堪味欲易極

母因口體累遂使愆民德

蜀山

在吳興弁山南十里

喧囂厭已久間居喜茲遂茅茨起高明澗道入深窅鑿
牖通震方開扉面離位藩編槿雜篁壁補蘿牽荔井欄
旋解苞田植齊吐穗溪山固可娛風雨亦足庇到日始
八九良友得三二客情卒難愜人性頗煩記時具茶果
招或遺酒肴餽感激壯歲心慰藉平生意茲欲尋幽期
弗暇理塵事諸方未遍遊近處聊一至指引賴必芻隨

行有童稚陟怯危磴敢瞰訝顏岡陂寨蔓悟險途披叢
見傾隧緩流似矜清舊藏欲呈瑞變綠亂藪薦發頰老
葉醉深村羈旅絕荒山古祠閤厓攢紫閣陰松映綺疏
繖聖像委蒙塵靈幡颯驚吹青史失記名朱榜但題謚
庭空衆草羅地僻百蟲蚊鳴禽語供弦飄雲影翻幟螢
停暗帷燈蝸篆仆碑字栢癭蟠輪菌瓠子懸重脰喬林
神鴉號卑薄鬼蝶戲甃虛泉脈通級夷石髮被怒蛙恒
瞋睛癡螳忽掉臂鼠行黠無聲螳旋馴有次壞柱腐耳

垂敗几蒸眼漬絲颺冒蠟蛸燐飛見魑魅蝨蝕供後花
猿窺祭餘器浮煙不熏爐溜雨常停解崩垣竈驚麝崇
簷巢惡鷗野蒿食復生園棗啄將墜牧笛秋霜清樵歌
晚風遲嵐光疑積愁谷氣如發喟對景獨感懷覽物各
求類癯祝勞遠陪慵僕倦久侍歸時羣動息日腳在平
地

題崔生南軒

軒居曠宜夏嘉樹覆前榮南風諒繁綠幽禽時一鳴理

榔陽光啓奏琴涼月生逍遙自旦暮于以暢閒情

閒居

謝事返丘壑退耕理田園茲心獲遂初稍得灑中悃振
策升崇巘揚舲遡長川驚湍信汨汨清溜自涓涓新蘭
艷遲日密竹曳叢煙東館朝燕坐西林暮獨還朋舊固
云曠山水聊資緣居喧暫亦遣習靜久乃便已幸駐靈
藥復能諷瑤編既無羨魚志外物非所遷

題王彥舉聽雨軒

高竹覆南榮寒蕉滿前渚蕭閒此中意適對清秋雨疎
當簾外飄密向窗前聚聲聞俱兩忘悠然坐無語

晉冀紀行

荆山

荆山揭高厓塗山聳橫壑長淮出兩間中斷見斧鑿洪
流受束縛浪起日鬬角誰能為此功在昔大禹作至今
遺廟存香火乃寂寞我來問邑人往事竟緬邈于時春
正深草木尚荒落登臨欲開豁覩茲反不樂更傷予和

泣三獻空抱璞

河口山登高

秋日何淒其嚴風變陽卉嘉節叶重乾時菊芬且靡臨
高一眺望仰見城郭裏三關為襟帶雙溪流瀾瀾浮雲
起天末鳴鴻在中沚雖非吾故土但悅山川美獨遊意
尚適況茲值多士珍肴出豐廚吳莢泛芳醴人生雖長
壽良時亦有幾對此不為歡憂思何由弭鑒此登山悲
飄飄然已矣

陽臺

昔聞陽臺名今上陽臺路我因興古懷驅車暫停駐餘
基尚突兀雲雨自朝暮哀猿失故聲野色賸孤樹當時
襄王夢曾與神女遇幽冥事莫測萬載誰能悟平原亘
千里巫山渺何處淒涼宋公子深情見遺賦

潁川

客程不論遠所愁在陰晦惡風滿川來雨勢晚逾倍船
爭急流上寸進還尺退枯葭夾崩沙路轉百數匯颯颯

孤蓬飛琅琅萬珠碎
篙師左右呼坐客默與對
去心雖云迫前途苦茫昧
德星無復覩洗耳亦何在
有懷仰高風令人發深慨

天井關

峯迴抱深壑下視天鑿井
昔人建重關扼險備邊警
鍵鏐久已絕垣石尚森整
峨峨尼父祠門掩衆山靜
曾聞此回轍無復過斯境
詢知鄉老言此事古未省
餘氓數家在破屋暮煙冷
我行力稍疲景物不暇領
且為投宿

來驚風夜愁永

羊腸坂

盤盤羊腸坂路如羊腸曲盤曲不足論峻陟苦躑躅上
無樹可援下有石亂蹙一步一嗟吁何以措手足途人
互相顧屢見車折軸少時徒耳聞今日親在目不經大
行險那識安居福

渡沁

陸行渴懷挹今渡沁河水奔騰走百灘聲遠聞數里我

來坐其涯肩擔欣暫弛不意山塢間偶得見清泚連朝
塵沙目豁爾淨如洗雖云倦行力對此亦足喜南風吹
青蒲白鷗忽飛起

劒池

闔閭試劒處靈泉湛澄靜苔花漬餘血石色帶古礦空
山秋氣寒幽林夜光冷月明樹交壁人靜霜折綆古懷
且當置清景庶足領

余克臣

秀野軒

濕翠浮草芽空青散木杪輕舟理橫塘歸人渡清曉樓
鴉返故巢潛鱗躍新藻倒景澹斜暉迴飈蕩晴昊衡門
夜不扃燕坐事幽討落葉秋自飄殘花春懶掃我欲往
從之稅駕苦未早揮手謝孤雲去去沒蒼微

王行

題趙元臨高房山鍾觀圖

北苑貌山水見墨不見筆繼者惟巨然筆從墨間出南

宮實遊戲父子並超軼高侯生古燕下筆脫凡骨沕沕
水墨中探破造化窟嘗圖得鍾觀景象照雲日長松映
飛泉霞采互飄歛今朝見茲畫臨寫意無失慘澹入窈
冥稜嶒隔岑蔚高堂時一舒六月氣蕭瑟平生丘壑性
塵坌欣已拂因之興我懷山中斲苓朮

秀野軒詩

高館罷零雨前榮颺微風霏霏碧蘿花吹落酒尊中移
席俯流水揮絃度秋鴻遙思獨樂意邈哉誰與同

樂韶鳳

送滁守周鼎秩滿復任

聖代車書一登庸，崇俊良禮羅天下。士銓選核精詳，維
時使君賢經術，成老蒼較藝騁奇健。機發能穿楊雲深，
閭闔開韋素拜天。皇服命展驥足，絃歌殊未央。萊蕪旣
奏最，五馬來滁陽。滁陽古名郡，前修政聲揚。世際昌運
期，赫奕神龍驤。天戈一揮掃，晏然靜八荒。疆理廓漢宋，
雍熙紹虞唐。郡縣古封國，守令誠贊襄。煌煌大駕來，迨

迨山驛長矧復凋瘵餘編氓雜淳龐駸北遍畿甸閭閻
課耕桑處置諒維艱敷布政有常奉承良靡倦撫字亦
多方政平淮土安報最信無雙錫宴新恩渥重開舊印
章瑯琊青入望滁水綠瀾茫父老應郊候羣僚擬進觴
通衢歡藹藹田野喜洋洋雲開豐嶺出亭古釀泉香蒞
政中都近蜚聲輿論揚願言終此惠遺愛詠甘棠而我
藉餘蔭豐年儲稻粱歸來松林下哦詩頌龔黃會看屏
疏徵勲業佐巖廊

滕毅

啓行

虞卿雙白壁魯連千黃金重輕豈在彼在此方寸心聲
名落天地輝采流古今沒齒無一稱終將魏朝簪晨趨
螭石下夕過鸞閣陰茲焉復申命載道荆山南閑中牧
龍媒韝上馴鷲禽豈徒飽芻肉神俊令消沉揚舠大江
水弭節春樹林高高向明月聊用開吾襟

三閭大夫祠

卷十七
檐帷褰薄暮迴颿吹白雲下有棲神宇慘澹臨江濱行
吟既不返遺響寧再聞綠榮並丹綵婉爾含清芬沐芳
正冠佩酌水炷夕熏長歌靈谷應春思何紛紛願言卜
瓊茅巫咸不可羣渚宮望儀羽再拜雲中君

楊訓文

春日遊真常觀

攜琴偶爾來尋幽入芳樹林深鳥聲寂坐久澹忘慮振
衣下崇岡斜陽在歸路

魏觀

至嚴州遺文員外煥代致其母平安意也

升堂拜慈母容色穆以和兩孫慰目前炯炯瓊玉柯呼
名使之拜拜罷仍撫摩問我之金華與子相見麼再拜
覆母言道取嚴陵過平安致母辭所處居有那行行及
二旬始達江之沱殷勤上槐省聞子行已他檣槩早晚
來又恐說者訛同袍重交遊為子笑且歌香拏紫薇花
酒泛金叵羅好懷盡傾倒不覺衰顏酡西軒儘瀟灑地

僻情不頗風生綠槐枝月轉烏龍坡銀燈漏疎櫺照見
庭前莎高踞嚴武牀微作杜甫哦諸公憐髦荒不復加
譴訶雖然出歡愛狂簡同一科睡覺雙目明殘星在銀
河慨然會真意披衣舞婆娑明發不可留王事毋蹉跎
題詩勗佳友美王思琢磨間情渺無窮扁舟沂晴波

東沅縣

東沅古名邑渺在江之干民居苦蕭條官舍亦苟完廡
陋紛草茅垣周翳榛菅棗植行疎疎槐陰鬱團團覲此

餘物清盍展規撫寬丞無兩松哦令乏五柳歡簿則頤
而長或謂棲枳鸞咨詢我初來偶滯風雨寒坐彼容膝
軒徐徐散憂端龍鍾數耆翁再拜陳肺肝小縣喪亂餘
人煙重凋殘百一雖幸存門孤戶仍單老者困以衰弱
者傷以孱況復差役頻斯須未遑安賴有父母慈桑麻
慰盤桓撫字皆得人昭蘇固無難援筆題此詩考績時
取看

劉崧

秋興

中夜畏煩促起坐愛涼風
明月在東壁流輝當井桐
翩翾林鳥翔喔喔鄰雞起
感時不復寐短髮聊自理

桃源

青林被重岡蒼石立絕澗
冥冥松風迴高蔓弱可綰
驅車鶴嶺下沮洳濕危棧
微茫煙霞集披靡杉筠間
高秋灝氣豁秀色紛屬盼
芒芒漣續予涉水恒及鼂
山女行負薪結髮垂兩朞
年豐粳稻足食狃芻與豢
呼吏不及

門征租少稽慢銀坑重茶賦往往先月辦緣山八九家
火耕習薊鏟土屋桑樹高雞鳴日方晏清霜落原菽夕
露沾畦覓吁嗟避秦人歷世乃多患豈知太平俗鎧甲
未嘗擐永宜曠士懷樂此謝遊宦種桃實吾事荷耒乃
不慣窮源愁日暮流水方泚泚歎息行險艱南雲送涼
鴈

蠶尖

日出西嶺赤鳴禽度高栢稍陟衣帶嶺東尖屹危參側

身忽旁斷擬步若幽探
勃勃草木霏高下皆浮嵐
巨石當橫途始復一解驂
崖古樹根瘦谷深人語含
石角利攢劒遠山突撐簪
何姑騎白鹿綠髮長鬢鬢
坐令婦女輩奔走祈春蠶
千崖動合沓秋色晚正酣
駕鵝飛益高剛風迴東南
我行蒙翳中胸刺寧所堪
山水能媚人夙性所樂耽
奚能戀文字局促如飮蟬
曠茲登覽際躑躅忘憂悵
振衣復少憩歷險不敢貪
片雲觸石起沅澤思遠覃
惜無晨風翼照影雙溪潭

送孫景賢歸江東

客有敬亭思春愁何渺然謝公墩上月已照江西船船
頭花亂飛醺酒發鳴鼓四顧不成歡悲歌淚如雨壯遊
南海上曾著從事衫驄馬青連錢馳突開巉巖南歸阻
艱難寄食贛江側多謝尚書公看客好顏色高筵列綺
饌賓客如沅雲舞劒萬人却談兵四座聞年華逐流水
五見楊柳綠夜夜夢故山浮雲滿巖曲茲行未可住卻
望江東還人散井邑空烏啼煙樹間殷勤候高堂次第

訪鄰里山栗與木瓜離離照煙紫放船弄明月躡屐凌
翠微春風久相待吹老薜蘿衣南平二月暮惆悵忽成
別把臂共論心知君有奇節東遊我所願遠作秋風期
卻攜采石酒高詠敬亭詩

送楊公望得滿字

君行服初命列醺當堠館賓從塞道周風煙激危管舟
航既泛泛珮璫亦萋萋滄江東沅深浮雲北飛遠林舍
春雨潤石抱蒼山轉朝驅歷荆吳夕秣邁齊兗凌雲紫

殿重棲日丹闌烜玉塞繚都城金河注林苑薇垣甚弘
敵天衢實夷坦鳳毛出西坂鷺翹翳雲罕誰論羽林直
自足郎官選茂名勗樹立令緒慎繼續茲辰悵言別于
餞宜樂衍日麗花氣薰鶯啼草香暖承恩貴在早返駕
焉得緩仰懷天外翮俯愧溝中斷竚立睇遐征城闌月
初滿

過南州訪友同王子與羅子理分韻得滿字

連阜衍平皋深林閔虛館揚襟暢遐思散帙延清款溪

萼花冪冪田黍實纂纂逕迴阡彌永水落澗初滿載欣
秋稼登矧愜人事罕欲往悲曠塗言歸理修曠

歲暮南歸留別蕭翀

旅寐不能旦披衣坐牀帷屋角曉色動鳥鳴已多時起
坐出庭際雲物正華滋殘雪未盡消羣山鬱參差即此
念故園焉得不懷思矧屬歲運周返駕固其宜理策望
前路揖君從此辭窮檐有稚子但訝歸來遲

游三華山

龍門兩山負一水下迴繞蒼峽忽中開飛橋出林杪盤
盤石磴引羃羃松林宵危闌正西挂層閣復東繚樹暗
盡含雲花明忽聞鳥懸厓傍架棧鑿石潛通突早聞三
仙人棲化迹已杳常疑雲月上顏色覲清皎丹井舊時
深朝真亂來少荒壇翳霜兼虛館閔崇籙凝神觀衆妙
屏跡謝羣擾懷賢慨重憩振翼思遠矯佳境能娛人何
因致清醪

早行霧中過田家失道

我行煙霧中不復辨原陸
幽幽聞雞犬隱隱見松竹
田家迷遠近阪路有崎曲
已覺瞻望勞誰云往來熟

江干草居


江干愜幽屏草扉亦常關
晚塗斷歸人虛市見寒山林
木變冬候繁綠忽已殷
鳴鳥相因依孤雲時去還
唐虞既云遠慨此時獨艱
四體豈不勤我髮日已斑
遨遊千載上偃仰一室間
樂詠古人書庶幾無覲顏

和荅蕭國錄八月十一夜對月有懷之作

林塘澹清華庭宇豁虛朗露井波澄輝風林葉交響高
言倡令德孤吟振遐想亭亭江上月肅肅雲鴈往美人
浩前期令節延遠望池魚既堪綸旨酒亦可釀永懷契
天游庶以會心賞宇宙本達觀如何較鉢兩



御選明詩卷十七



總校官庶吉士臣侍朝

校對官檢討臣蕭九成

謄錄監生臣傅瓌芳

欽定四庫全書薈要

集部

御選明詩卷十八

欽定四庫全書薈要卷一萬八千五百十八

集部

御選明詩卷十八

五言古詩三

周湏

始發建鄴登龍江山祠感懷有作

去國思舊遊尋山發幽眺遙凌天門石恍對臨海嶠神
關列雄鎮危堞抱遺廟秋陰散氛翳炎景扇餘燎天水
遠自空雲霞近爭耀客行始多感世事紛難料同俗豈



素懷趨時固殊調既為達士恥復被逐臣誚行矣庶無欺忠信將可劭

賽小姑廟

育秀凌華嵩標奇莫淮楚陽闕啟神闢陰沈開水府渾渾聚商舳淵淵聞戍鼓陳瑟會安歌傳芭紛代舞椒漿既芬潔桂櫂方容與日暮懷歸情含睇望修渚

劉承直

讌章光遠宅

薄暮沐時雨，凌朝陟崇山。
洩雲去復來，流水清且閒。
褰裳俯茅屋，高論激晴澗。
層軒既顯敞，好鳥鳴間關。
樽意殊樂劇，飲未言還。
何當脫塵鞅，共卧青松間。

秋日東林宴坐

高秋坐虛館，颯然神慮清。
迴飈颺疎雨，瀟灑集前楹。
始欣塵瑤遠，稍覺微涼生。
簷鐸遞相答，林蟬時一鳴。
物情各有適，吾生豈無營。

黃肅

詠懷

少壯好遊覽不知中道憂方茲懷故土眷此成淹留負
闕蔽朝暉玄雲陰以浮徘徊當永夕嫵婉將焉逌棲鳥
翔不息鳴蟲亦啾啾人生無定止卒歲何能休

流水日夜流厚土胡不盈人生自不已四運有相承達
士識物化昧者徒營營蕩蕩晨風來悠悠天宇清會當
撥塵惡聊復從吾生追呼心所歡置酒坐中庭忘言勿
復辯觴盡還復傾

中園桃與李灼灼有奇花彼姝將折贈遐思在天涯此
花傷天折為歎女容華盛年難再遇豈得長修姱夫子
新好合不能思故家欲因歌此曲此曲令人嗟

匣鏡三十年塵暗不復治停餐且不寐所思知為誰
子不復返眇在天一涯綻衣終當組道遠何能持明明
天邊月三五入中閨念與子懽愛不得同光輝寤言相
與共既覺將何依

牛諒

西郭憩景德寺分韻

靈湫閔白龍古殿敞金粟僧歸林下定雲傍巖端宿伊
余陪勝引於此避炎酷息陰悟道性習靜外榮辱坐石
飛清觴每歎白日速別去將何如留詩滿青竹

蘭以權

題越上人臨清軒

塵境不可居飛錫傍流水高檻接空溟新綠渙如砥孤
影過寒鴻悠然逝羣鯉所以川上人於焉契斯理卜築

擬幽棲兼足浣塵耳愛此春雨餘波光淨禪几

桂彥良

和陶

我生雖阨窮牆屋亦苟完集芳被荷葉隱居思鷗冠素
無怨懟心安有憂戚顏明月照溪堂清風隱柴關螺杯
偶獨酌焦尾時一彈悠悠五噫歌遠懷梁伯鸞庭前種
梧竹清秋共高寒

顧或

滬瀆壘

江迴原野濶海翻波濤起征客期門歸弔古滬瀆水平
疇麥草青澀土箭鏃紫月黑動北風塞鴈聲在水

丘民

周玄初祈晴

閏逢歲之半白袂白如煙野人不敢出封戶聽雨眠夢
跨蒼精龍六丁相後先手持五色石直欲補漏天剛風
忽引去天門方洞然忽見一道士青眉長娟娟綠章褱

紫霞稽首上帝前上陳太守辭下述萬姓瘼稔無一尺
苗潦涵累百廛陰霓走白日黑蜨嘘長川百怪不自閔
三光何由宣帝怒叱力士磔裂無留連即遣東王公高
掣羲和鞭金雞恍驚覺日出扶桑顛

孫作

謝馬善卿送菜

嘗欣食菜美自謂肉不過今晨齒頰間屢燕安敢唾持
梁嚙肥鮮野蕪誰當課使君可憐人異味諳小大我本

江南樵酸寒羹不和空腸轉藜苒糲粟運糠糲雨韭春
割苗霜菰秋飮座羊蹄釀旨蓄蒲歎雜細坐芋魁掘地
底茭首洗泥科木魚三百頭竹笋一萬箇朝湘出山厨
夕煮吹煙銚堆盤青黃具入口生澀奈以茲媚盤餐頗
復如君作採之諒有時蒸或躬自佐白鹽點葱橙紅椒
羅白磨蔗錫質劑調醞醢芳辛破香飯炊屢熟宿酒醒
方餓鵝掌推不受驚裙空欲蛻饋案連十罌飽食深自
荷霜根咀寒齏三歎論奇貨冰壺奪仙厨適口騰軒簸

四海一東坡拙謫常坎坷參軍半畝菜詩句劇嘲賀我
憊不償一造物知何那抱甕力不任負鋤筋苦墮亦欲
賦歸田自種百畝稔傳君作菜法華薨旋封裏食勤不
媿天日晏從高卧

菽乳

并引

豆腐本漢淮南王安所作惜其名不雅余為改今
名因賦是詩

淮南信佳士思僊築高臺八老變童顏鴻寶枕中開異

方營齋味數度真琦瑰作羹傳世人令我憶蓬萊如葷
厭葱韭此物乃呈才戎菽來南山清漪浣浮埃轉身一
旋磨流膏入盆壘大釜氣浮浮小眼湯汨汨頃待晴浪
翻坐見雪花皚青鹽化液滷絳蠟竄煙煤霍霍磨昆吾
白玉大片裁烹煎適吾口不畏老齒摧蒸豚亦何為人
乳聖所哀萬錢同一飽斯言匪俳詼

飛魚并序

暨人航海得飛魚於黑水之洋其長二寸頤兩鬚

各廣長寸餘張為兩翅海風發作從波濤飛集船上如燕雀既止則不能入水意者爰居海鳥亦此類歟莊周所謂鯤化為鵬不荒誕也為賦一詩

海於天地中物不能比大陰陽浩出沒造物窮荒怪力足浮三山勢欲吞大塊豈惟日月浴兼疑鬼神會披經案山海異族紛瑣碎我時一徘徊足躡二儀隘焉知賈客輩入海如入闌風昏白波駛雨慘黑洋邁批石噴火發

海船夜投物波中如火烈

蜜指愁舟壞

舟人見海怪則蜜指注血於波其怪乃沒

飛魚

集檣拖翅尾錯珍貝初疑燕雀翻復駭蝗螟墜非類感
所稀枯腊拾海外三韓雨霧洗百島風煙帶參差插雙
翰敲側張兩旆形模小鮮具意氣鵬鶴類祇慙海若笑
狹小矜此輩我復嗤海若萬彙同一態神靈數巨魚鯤
鯨鰩鰐魴智屈雲雨能肉大何足膾龍門萬魚躍此翼
吾所快

唐肅

送陶元庸

有酒澆趙州無酒酌鸚鵡不逢平原君何須識黃祖殺
姬謝甌士茲事付塵土誰能愛文章甘受嫚罵侮丈夫
氣蓋世身為知己許蒼茫風塵際因子慨今古臨岐舞
銅劍霜隼陵平楚去矣江國遥相思隔津鼓

藍仁

秋山懷友

天寒草木疎落日照平野孤雲西北馳獨鳥東南下仰
聆寒蟬悲俯見驚湍瀉物情自索寞秋色正瀟灑良朋

久相違離思何由寫

擬貧士

蠅蛸網我戶蟋蟀號我壁被褐不掩脛采薇豈充食歲
有飢寒憂巷無車馬跡豈知曠達觀不以貧病迫昔聞
孔顏聖亦有陳蔡厄澹然忘世慮絃歌自朝夕

蓬門有一士被褐恒苦飢朝飲南澗流暮食西山芝雖
有二頃園蕪穢亦不治妻子共寂寞彈琴詠書詩荒林
積雪深古屋炊煙遲高卧自有適何必他人知

宿田家望武夷山

仙厓蓄靈異怪石盤空曲一水隔花村千峰入茅屋金
芝暖逾秀瑤草寒更綠雲中武夷仙一一顏如玉白馬
去不歸玄猿叫相逐昔陪丹丘侶酣歌紫霞谷雞鳴洞
天曉落月在林木空瞻仙子高舊夢那可續荒林激悲
風日入對樵牧佇立望歸雲解衣田舍宿

正月十四日西山感興

久曠山水遊今晨願無違松林收殘雨郊原澹朝暉
憩

澗弄清泚緣岡陟翠微池魚暖始游巖花寒尚稀高人
坐空堂深竹對巖扉山中聞犬吠谷口見樵歸心賞適
有契仙遊詎能希賴此一樽酒暫然息塵機古來朝市
間榮華多是非所以首陽士白首常采薇

暮秋懷鄭居貞

季秋霜露降草木日已衰暮登城門丘遙望滄海涯鳥
鳴求其羣況在遠別離美人顏如玉夢寐恒見之飄蕭
紫鳳毛照耀珊瑚枝海水不可越丹砂詎能期豔豔杯

中酒泠泠桐上絲豈無一日歡念子來何時少壯難合
并流水倏如馳悠悠逝川歎渺渺停雲思

宿橘山田家懷蔣先生

蒼峯落日微白鶴秋風遠客路入疎鐘田家背山阪孤
煙桑柘寒歸鳥茅茨晚欲覓紫芝翁山深白雲滿

西山暮歸

涼葉墜微風秋山正蕭爽天寒獨鳥歸日夕百蟲響偶
從桂樹招遂有桃源想石磴闌無人山猿自來往

暮歸山中

暮歸山已昏，濯足月在澗。
衡門棲鵲定，暗樹流螢亂。
妻孥候我至，明燈共蔬飯。
佇立松桂涼，疎星隔河漢。

藍智

客建上將歸山中留別錙典籤

入山願遠遊，出山願早歸。
羈懷苦無悰，芳序倏已非。
瀾江海流紛紛，花絮飛清霜。
變玄髮，游塵化緇衣。
難危迹易乖，少壯心轉違。
雲鴻每獨往，梁燕當疇依。
野樹滯

殘雨荒臺淡斜暉
浩歌綠水曲空拂黃金徽

書懷寄示小兒澤

昔我南澗來遂謀西園居
瀟瀟桑柘陰下有比屋廬
交枝轉黃鳥澄波躍文魚
花香入戶牖草色連階除
衡門閉白日高詠古人書
目送遠山雲心遊天地初
貧賤固可樂富貴將焉如

張紳

題畫二首

高樹漏疎雨滴瀝下銀塘美人捲簾坐銀鴨自添香風
吹綠荷葉正見宿鴛鴦

閒門綠樹老華池芳草生偶隨蝴蝶起獨自下階行何
處垂楊院春風驕馬鳴

吳彤

峽口晚泊

川路渺無際揚帆溯流波征人歎遲暮舟子方笑歌去
去日將夕維舟松上蘿坐嘯微雨歇洲渚落花多

翠壁隱殘照滄洲生夕陰鷗鳥忽飛去幽幽春水深涉
險念先訓觀風推聖心功名覺遲暮蕭颯二毛侵

日落潭水綠松間聞子規征途一萬里江月每相隨王
事有程度人心多嶮巇用詢庶有濟驅涉不知疲

江煙斂初夕華月入我舟坐久風露集微寒侵敝裘戍
鼓動邊思權歌縈客愁漸聞湍聲急度峽是歸州

陳約

錦屏

赤城多奇峯錦屏亦殊勝不知何仙人遺蹟在幽徑松
霏灑石牀竹雪墮風磴徘徊對巖花忽送一聲磬

秦約

田家雜興

猗猗魯桑條籊籊湘竹竿並舍掩映之客來相與看薄
暮墟囿中清燕有遺歡弋鳧未用置烹鯉且登梓靈河
素魄流斗柄長闌干明朝還醉醒毋辭共盤桓

張適

宿王耕雲山莊期衍師不至就題竹上

山館絕塵交唯容謝公屐洗酌松下泉題詩澗邊石吟
僧期不來掩琴坐岑寂貌此林外影雨餘正凝碧

暮秋久雨

積雨秋景徂空齋坐來暮葉鳴風中零鴈唳雲深渡濁
醪慰羈棲幽吟寫情素開軒對綠竹適然自成趣老鶴
忽長鳴蘿窗掩微霧

贈何山人

金
卷十八
君從山中來衣帶松蘿雨謁我湖邊居聯牀夜來語藥
囊掛石壁酒壺列芳几杯餘歌青天絃中寫秋水既恆
丘壑懷尤能慰羈旅明發言當別飄飄更何許

冬齋積雨感懷

積雨冬已深寒雲晚猶密空齋沈無人何以遣愁寂輕
風渡長林落葉滿苔石因乖常談友自驚久遊客僮子
頗情親勸我加餐食醪至不辭斟柴扉掩初夕

擬古

我馬既已秣我車亦已膏游子志遠行豈憚終夜勞海
水自言深泰山自言高去去涉長道歲月疾如埽譬彼
風中花哀謝不復好惟有惓惓懷日夕不離抱

范準

松蘿谷

尋幽興未涯窈窕入深谷長松生晝寒香蘿蔓春綠
縣石上葛冉冉籬下菊樵子時相逢和歌自成曲吾將
從杖屨題詩滿青竹

周愷

讀子書作

學館坐無事故書聊復看披文既薈蕞尋義亦泮渙起
前後已逸顧舊新輒竄萬言雖畢陳一理竟未貫往往
未終卷心目已潰亂置書斂視聽境地甚澄晏易書詩
春秋辭簡義亦煥冊書言五千隱約可徐玩奈何百家
言磊磊疊几案綿延比葛藟根遠益纏絆遂今矜名士
摹放如習幻雕刻出葩卉綴緝呈組纂悅目效女美飫

口匪芻豢推以合身心宜若霄壤判吾欲盡其文掇取
歸爐炭觀心勝觀書矼矼坐夜旦濯穢來清澄磨昏出
璀璨綿綿春雲舒炯炯秋月爛詠歌成文章昭倬比雲
漢往者予弗及來者予何憚作詩示朋曹無乃駭童仆

贈別郭元達

黃鵠乘天風飄飄忽高翔飛飛巢林鳥刷羽情內傷豈
無凌雲志六翮不得長念子平生意相送以傍徨勿言
易為別明發各一方悲來解佩劍為子復進觴且為游

子歌歌詞何慨慷疾風吹征颿旭日在衣裳自古有離
別各言慎行藏

金絢

王彥強破屋風雨圖

讀書幽澗濱茅屋走風雨窗疎木葉鳴月暗燭花吐隱
憂不可寫俯仰慕前古美人何由招娟娟隔秋浦

馬治

罨畫溪

積雨洗崖嶂奔泉會空曲流為千丈溪泓停深似玉霞
冷發彩翠花豔分紅綠浦雲自點綴岸峰相映燭旁穿
霞澤口直瀉頤山腹日暮扁舟來漁歌出湖汭

任公釣臺

伊人不可見古臺臨野水惟應公事閑意釣還來此城
門日色暮郡舍秋風起鳥飛綠蕪上猿啼碧山裏官情
方淡如野性或偶爾巉巖雲溪石其下亦清泚

夜坐懷孝常

東齋見微月露坐稀華星感物增惋傷懷人在巖扃高
情沐垂照寤寐不遑寧中夜夢良覲君歌謂予聽清商
隨風起虛箔轉琴泠款密松下室踟躕水邊亭常時往
來處目擊心已冥覺聞西澗流離合方悟形雞鳴空山
曙開戶竹林青忽枉蓬華信芳緘耀雲屏悽悽貧賤交
惻惻秋露零昔如雙飛鵠于今兩枯萍詩中語再四年
運不暫傳道術尚迂邈焉能事仙靈騎鯨倘可望同日
戲滄溟

南澗聽水聲送別太古禪師

汨汨石上語瀏瀏風中琴
清晨南澗流似是太古音
出谷乍喧冗入林杳深沈
後來自相續前者既難尋
問客何緣起悠悠傷別心

對新柳

縈縈初月柳撩亂愁邊見
因憶武昌門高想靈和殿
金塘承日映綺陌迎風轉
學舞未能休櫻情欲誰眷

讀書

竄身丹厓下滅迹浮雲端餘事既不間冥心以遊觀讀
書南山日秋氣浩漫漫悲商扣庭柯四座鳴風湍已與
清景晤樂哉此盤桓餐和遺糟粕飲勝入肺肝隱几俄
萬古其人夢交歡攜手逍遙墟乾坤歛高寒顧謂塵世
子斯道自平寬胡為在荊棘方寸生波瀾向無問津者
悲爾後來難

盧熊

遊銅井山

行春入銅山披榛訪苔碣展席具琴樽談詩暢林樾溪
柳漸生萸谷鶯未調舌文漪細含風小梅清映雪眷彼
素心人寒香不堪折

盧儒

道安堂為周文伯題

鼯鼠飲河流鶯鳩搶枋榆適意已云可多營徒為虛黃
鵠起高翔遨遊升天衢忽逢弋人繳墜翼難再舒退者
止足全進者忘其軀

衛生不求盈稍足遂愜意服厭成都錦飯舍山陽糴春
熟收繭絲秋成斂禾穗田翁笑相語秫酒聊同會秉耒
因時暇翰墨欣游藝多遺一羸金徒為子孫累

鄔修

中秋分韻

秋月已成規秋闌猶列戟妙契結金蘭今夕是何夕時
序有代謝情懷增感激對酒發新吟此樂良難極

葉見泰

蘭莊

霜風薄林泉衡門迹如埽
賴有楚畹花相看慰幽抱
芬芳發懷袖落日思遠道
遠道不可遺歲晏徒自好

劉炳

春夕直左掖懷周侍御

晚雨池上晴逶迤
淡將夕金莖華月生
綺樹流雲濕窗
虛漏聲永幔卷
爐煙襲憶我同袍人
何由共瑤席

憶園廬

種園在東皋草荒瓜蔓長日落秋樹冷褰衣獨還往時
逢野老憩自足田園賞沿溪暝忘歸古寺煙鐘響

得漢爨簡周伯寧索香灰

古爨多款識螭螭漢篆存黃金銷土色翠羽隱雷文綺
席流寒月銀屏度綵雲蘭灰能裏寄長吟盡夜分

別京邑之東阿

前年別鄉閭今年出京邑悠悠去江漢杳杳事形役所
懼心志違況此風波急烏啼楓樹煙鴈下蘆洲夕回首

望長安蒼茫寸心失

郭奎

擬古思友

鵲鳴歲將晏薰葭淒以霜思君隔山海道路悠且長睇
彼參與辰清夜悲未央狂飈西北至一鴈方南翔言念
疇昔歡與子同衣裳安知異寒暑日月不我將天高則
有斗川涉愁無梁憂心隱如惄出戶徒彷徨

寄李彥端

嘉樹藹夏綠清風動虛襟念君有高超勞我徑寸心佇
立東城曲日夕見雲岑以茲世多故忘彼升與沈聊樂
在書籍佩玉懷所欽華池散帙步當戶鳴幽禽蘭生已
覆井泉響迴出林醉將山口月彈作絃上音明月照別
鶴遺音戛南金何當坐松石從爾聽瑤琴

擬古贈別

孟冬霜露降悴彼荷與蒲青青蘭蕙芳采之將焉如贈
君夙昔意聊以慰斯須絃歌厲清響置酒岐路隅親戚

念遠行各言勉良圖常恐不為樂日月方其除晨風奮
高翼北林多古榆臨歧執子手安得同車驅

送江彥英還錢塘

東南有高樓華日照綺楹瓊筵列海錯雜以絃歌聲疏
簾卷晨夕迴看滄江清君今利攸往我獨懷鹿鳴執事
望長路駕言出東城嘉會常不足何況臨當行晴郊芳
樹碧綠渚春蘭生持觴意難盡相思空復情

紀夢

忽忽頽芳年搖搖寄行役寢興勞形神鬢髮玄已白驚
風響庭樹憂思日恒積夢魂清夜歸彷彿舊鄉邑青松
在園田桑柘蔭廬室飛鳥雲際還牛羊下來夕澄湖澹
微波秋山有佳色雞犬雜比鄰墟煙靄阡陌怡怡兄弟
情淒淒丘隴側臨流濯長纓挂冠坐磐石似慰平生歡
覺來異疇昔百年如轉蓬萬物乃遺鳥天命良在茲勿
用云得失

寄陳教授敏

蘭葉欲覆階馨香襲芳室雨露之所滋惠風偃華質采
采不盈筐薄言贈離析憂傷歲月愆同聲而異迹人生
寄百年寒暑會有役歡樂難俱并浮名亦何益高誼諒
非他可以比金石

送王彬叔往同安

駕言出城門遙望西南路別離良在茲嘉會不常遇置
酒張瓊筵綢繆復凝佇飲餞未崇朝聊以慰情素翩翩
白羅裳皎皎瓊瑤樹高步凌青雲豈為紅塵污春江及

信潮芳舟襲蘭杜小人衆所疑君子誰不慕久欲同車
行攀轅莫能去惜哉苦淹留年芳易遲暮顧盼懷殷勤
增我越鄉慮

李應榮

奉使塗中作

驅車出東郭遠上天台城峯高插霄起屹立如迴屏前
塗在雲杪彷彿秋蛇行俯視萬壑底澗水嘈嘈鳴恍然
心目眩幾欲墮危崢況兼風雨至泥滑如飴餠一步三

退縮戰慄若履冰僕夫屢顛躓行者難為情神武恢疆
宇垂念及生靈俾將誠信辭以息東南兵藐焉一小子
敢不來趨承

王蒙

海子橋

暮登海子橋西繞紅門歸霜風著宮樹葉葉帶紅飛據
鞍吹短筵乘月擣征衣江南冰雪裏音信寄來稀

有感

卷十八
馴龍若御馬下上何足奇飄搖海東鸛司晨不如鷄白
雲本無心每與仙人期悠然巖壑姿卷舒豈無時偶來
還自賞倏去令人思燕臺十二月雪沒黃金基正月河
冰泮二月下流澌江南三月暮落花舞晴絲歸帆天際
來煙雨渡江遲淥波映吳樹雙飛錦鷗鷺相思極春水
一夕到天涯

姑蘇懷古

崔嵬靈巖山突兀姑蘇臺具區若明鏡曾照西子來玉

容今寂寞滄海飛塵埃

金精發竒氣劒去虎亦無鴟夷已浮江滕王不可呼沈
沈數千載一鳥下平蕪

天竺日章法師得旨還山畫泉石間齋圖贈行
并題此詩

沖懷澹如水萬境猶虛空忽聞還山詔喜入哀顏紅山
中何所有手種石上松茅屋闌無人恒有雲氣封清鐙
照佛龕鑪煙裊松風砮崖噴飛泉赴壑如撞鐘羣響自

起滅聞心本無窮塵銷諸念寂夢覺非有蹤九旬談一
妙政爾開盲聾孰持去來影觀作真實同去隨流水遠
歸與雲相從無心任玄化泊然齊始終秋風動江漢波
浪皆朝宗雲帆挂海月渺渺五湖東

陳汝言

雜興

皎皎秋夜月流光鑒薄帷憂思不能寐況此蛩聲悲攬
衣起徘徊四顧安所之故鄉渺何許身在天一涯

秋風起蘭皋蕭蕭墜霜葉空庭坐無眠清漏何時徹美人胡不來慰我經年別相思復相思中腸九迴折黃鵠四海志良馬千里心丈夫誓努力奚可終陸沈感此秋節至砌下蟋蟀吟秋來不能寫且復絙吾琴

亭上

汲清漱晨齒沐髮冠新幘閒來歷亭上對此南山色天高雲鳥空秋淨水花白悠然淡忘歸孤懷聊自適

登溪山第一樓有懷倪元鎮

清晨獨倚樓秋色淨如洗山青雲弄姿江白風初起心
隨沙鳥閑目送征帆駛對景每懷人相看隔千里

奉陪遂昌鄭明德錫山倪元鎮燕潘仲昭左丞
園亭分得霧字韻

林園春雨餘竹色浮綠霧美酒生微波殘梅雜芳樹塵
喧隔清池玄賞愜幽趣偶同文翰遊及此良時遇

為吳明遠作南野圖并賦

冉冉庭樹春盈盈原野綠鳥弄晝初長人耕雨新足閑

時一冊書坐對南山讀豈不樂吾真淡然忘世俗

蘭

蘭生深山中馥馥吐幽香偶為世人賞移之置高堂雨
露失天時根株離本鄉雖承愛護力長養非其方冬寒
霜雪零綠葉恐彫傷何如在林壑時至還自芳

李晔

發雙溪

我我金華城行李何淹留閏十月初吉始能具扁舟輝

輝晴旭升莽莽寒煙收篙師戒晨發浩嘯當中流揮手
謝送者此行實夷猶昔為山林居今作江海遊撫心媿
麋鹿放跡同鳬鷗丈夫既許國生理焉得謀功成纔拂
衣庶以追前修

泊鷺鷥灣

朝辭婺女城暮泊鷺鷥灣鷺鷥暝不見但聞水潺潺水
聲日西流客子何時還長風吹征衣慘淡生愁顏

嘉禾

晨發嘉禾城晴日舒我顏水深野岸濶驛古秋花斑回
頭指點中已過三塔灣少年所游地頭白今始還沙鷗
喜我還來往清波間願為忘機翁與爾俱投閒

言懷

今日忽不樂少為川上遊童冠相追隨衣服紛好修紆
徐既就坂崎嶇亦經丘是時鳴雨餘氣候如清秋嗒然
拄孤藤聽此涓涓流往者既云邁來者無時休周流信
無滯至樂常悠悠俗士勿與言永為智者謀

李珣

和友人過西郊韻

秋原晚蕭曠杖藜荒逕微川迴衆鷗集天清孤鶴歸寒
煙蔓草密積雨豆苗稀臨流擬結搆息歎振塵衣

朱芾

賦得秦淮送宋仲珩

春漲曉沄沄空明澹孤嶼中流送行舟綠波渺南浦鷗
從青鏡下人立滄溟語素縠漾涼颺圓紋散疎雨桃葉

懷舊題後庭歌弔古因之寄離情前洲采芳杜

李延興

江皋圖

江晚月未上白煙滿芳洲雨止山氣佳衡扉在巖幽浦
迴沙漫漫松深露浮浮水田早稻熟稍欣獲有秋曠爽
來清風朱夏炎歎收野人樂江居垂綸水西頭得魚送
鄰家酒好仍見留童仆喜相隨浩歌送蜚鷗古時放達
人傲睨輕王侯馬能繫塵鞅憧憧為身謀

胡翰

南箕長好風

南箕長好風東畢復好雨陰魄生自西終夕成乖阻悠
悠望彼蒼脉脉不得語起坐酌酒漿北斗在庭戶

冬日何可愛

冬日何可愛夏日何可畏矯首問羲和羲和不停轡寒
燠相代更天運自有常但惜愛日長不及畏日長

鬱鬱孤生桐

鬱鬱孤生桐託根鄒嶧巔皎皎白素絲出自岱畎間一朝奉庭貢妙合良自然桐以為君琴絲以為君絃中含希世音置君離別筵征馬慘不嘶僕夫跪當前君行千里道豈惜一再彈南風日渺渺清商動山川和者昔已寡聽者今亦難

人生苦偏側

人生苦偏側莫處荒野間殺機起不測朝夕相構患尺書下齊城九土封秦關用意何崎嶇舉世尚其賢湯泉

水長溫蕭丘皦長寒天地有至性貧賤吾所安

維南有佳菊

維南有佳菊風露發清妍離離綠玉樹粲粲黃金錢色
含坤裳美質抱日精圓蘊靈自女几滋布瀾樊川既入
神后品還充仙子餐中壽登百歲上壽延千年千年與
百歲何異瞬息間獨有幽貞節可比金石堅託以奉君
子歲晏期弗諼

擬古

一夕復一夕一朝非一朝昨見春花開忽睹秋葉飄人
非金石姿安得長不凋窮年事觚翰駕言遠遊遨手提
具櫛劒拂拭鸛鵲膏含精變光彩上薄青雲霄願君勿
棄置佩此長在腰南山有猛虎西江有長蛟斫蛟取猛
虎始貴非鉛刀

白馬誰家子翩翩新少年寶帶千金裘鞍垂兩橐韃五
侯爭馳鞚七族莫比肩來往長楊間捷出飛鳥先朝從
羽林獵夜展秦樓筵前楹列庭實中庖具珍鮮趙女舞

雙袖吳姬調七絃張急調高起酒盡意彌堅恨無美人
贈中激壯士肝睽離各自愛重來還復然

梧桐生朝陽不附衆木林上枝拂雲漢下根固重陰歲
久材質古斲為姚氏琴朱絃絙橫理加以玉與金徽軫
何粲粲清彈揚妙音重華不可見懷思意何深

飲酒須飲醇結交須結真貌合不足貴言合寧可珍長
安桃李樹家家自陽春常時握手者孰是同心人吳中
有雙劍一奉洛陽賓精靈颯以合萬里情相親

游仙詩

夙志慕仙術笑傲人間春
朝陪瑤池燕暮揚滄海塵
道逢安期生遨遊乘采雲
粲然啓玉齒遺我紫金文
天地此中畢世人不得聞
受之今十年留待逍遙君
青鳥從西來飛去扶桑津
寄書久不到白首悲秦人

呂梁洪

河水趨東山四曠無險塞
呂梁扼其衝凜若萬強敵
水勢與石鬪終古怒未息
舟行齟齬間衆挽不餘力
進始

踰跬步退忽落千尺長年起相語茲土神所職登祠奉
嘉薦拜跪陳下臆船頭勇牽纜檣表高挂席好風東南
來送我天北極叱馭誠足欽垂堂詎遑恤昔聞莊叟言
有山在離石懸水三十仞魚鱉皆辟易孰隳天地性遂
拯生民溺鴻飛九州野吾願觀禹迹

西村老人隱居

振轡起陳力投簪遂辭祿吾今見伊人逍遙在郊牧令
節春載陽芳辰日初旭鳥鳴萬樹巔牛飲澗溪曲翳翳

桑柘陰藹藹來年熟耰耔返故畝經過候新躡高榻生
風涼練衣無暑溽披帙欣自悟臨觴復誰屬情真不肅
客意豁已忘俗列生談力命老氏貴止足

命童

今晨雨新歇日出東南隅草樹有佳色當軒散紛敷歡
言命童僕治我園中蔬幸此琴冊暇且復一荷鋤雖有
黽勉勞良足具中廚但恐惡草長不治成荒蕪世事每
如此豈敢忘勤劬

青霞洞天偕章三益僉事觀石枰

太末一為客倏忽三四齡常恐玄髮變未諧滄海情今
晨屬休暇文彥皆合并方舟濟沙步飛蓋指巖扃青霞
天之表赤日午正亭息陰無擇木抱渴無藏冰寧知大
火維有此真福庭巨石跨千尺如梁架青冥深疑地肺
開洞見天光明玉樹交左右禽鳥無一聲涼風度澗水
炎濁蕩然清昔聞偶奕者坐隱交心兵相持勢方急旁
晚耽若醒柯爛胡不歸海枯固其恒蠻觸遞翻覆大化

何由停不如飲美酒且置石間枰

桐谷山房

客從山中來為言山中居種樹不作琴清陰常繞廬脩
然窗几間中有竹素書上窺聖人奧下挾百氏殊寥寥
千古意問子今何如勿學臧與穀亡羊苦多途願企心
齋人不遠復爾初歸撫庭前柯應見雙鳳雛

貝瓊

雜詩二首 錄一首

春山一雨過百草皆縱橫百草不出山山中人遠行懷
金別妻子殉祿辭父兄寒暑忽已易燕趙千里程龍門
能碎舟風浪安可爭性命輕鴻毛苦為朝暮營愧此山
中草萋萋林下生

郊居

直木惡為輪疲馬思卷旆
佳時既非才處約斯寡悔
采詩鑒興亡讀易明進退
永懷嵇阮放甘與沮溺對

答客

竊祿非本性適彼南山阿
藜藿日不充慷慨獨商歌
有客向我言與世同其波
商君震七國季子傾三河
區區守章句白首成蹉跎
念之為三歎所樂良已多
潛魚駭釣餌飛鳥愁網羅
結駟非不榮違已當如何

春日宴滄洲并引

歲在著雍涖灘春三月一日筠谷高士合賓客序
兄弟飲于滄洲一曲平池湧翠高閣延青圓景中
天繁陰四合微颺遠激幽芳襲人清醪在壺嘉餚

既旅懲蟋蟀之刺儉美伐木之求友終宴忘疲遷
坐復酌鳴葭間發協朱鳳之相和舞袖雙回翩驚
鴻之欲舉嗚呼蘭亭金谷會豈能常滄海流沙烽
猶未息懟神仙之無驗宜曠達以為高用綴新篇
以紀雅集詩曰

天濶無留雲山明洗新黛過從屬休暇置酒滄洲會柔
莢綠堪藉雜英紅尚在累觴既不辭秉燭還相對清彈
促哀響祕舞呈羞態蘭亭今已矣金谷徒增慨大化會

有終四時寧復貸厭厭夜無歸從人譏倒載

讀史

吾憐閔仲叔始辟懷喜懼及其見司徒喜懼亦皆去勞
苦非所堪虛名豈相誤用舍何必言投劾時已暮

周變久不仕身屈名四馳元纁一旦至舉族更勸之安
知修道者出處亦有時慨然中途返獨守東岡陂

東漢多逸民山棲久懷璧法真亦逃名詎屑三公職求
蟬在明火求士當務德此道今何如其人安可識

樊英抗高節萬乘不能屈設壇為見之豈若壺山逸光
祿位已崇佳時竟無術遂興張楷譏尚待黃瓊出

歲初度日書懷

余生若小草望成百尺材強因客土植苦被秋風摧徒
慙五十過況經元二災白髮不可變青陽忽已回未忘
藥裏好幾見桃花開殘編掩黃石虛室生蒼苔故人且
共棄王孫誰復哀終歸葛洪井詎上鳳凰臺哀榮置勿
論待月酌金壘

初夏郊居

強學不知老，索居恒鮮歡。
誓將從余好，山河阻且綿。
淒淒風雨交，四月秋浦寒。
夕寢不能旦，日高猶未餐。
念之安所尤，通塞固有偏。
庶無外患及，力稼或逢年。

仲夏桑扈鳴，氣清天愈高。
新田已當治，南風翼良苗。
田翁起相戒，庶務東作勞。
豐年諒可必，勿為蔓草交。
嗟余失路久，竟負伊人招。
屢空亦宜然，何日耕東皋。

早春

山寒花尚遲雪霽江已綠懷新感游子
哢節喧衆族且同尊俎樂幸免章綬束
更擬登前峯青郊可遊目

題盛蒼崖鴈

八月鴻鴈來往彼天南陬前飛倦已
息後至飢相求日落洞庭晚風高彭蠡
秋彭蠡多蘼葭遠近彌汀洲恒恐羽毛
損稻梁非所謀塞門阻兵雪異鄉安可
留徘徊念其族天外復千傳身今萬里
客肉非九鼎羞慎為弋者獲遠寄征人
愁願以海為池上同朱鳳游飲啄全微
軀

不愧波上鷗

初冬

一氣變昏旦洞房風露淒田禽亦已化秋蘭同蒺藜為
客久成老懷人殊未夷慘慘白日暮迢迢歸路迷世哀
不獲騁天遠何由稽永思讀書臺言采山中莢

擬東野

破屋夜通月霜氣刀稜稜病骨不受寒卒歲仍無繒殘
燈吐復翳僵卧如凍蠅事業慚蒸沙文章空鏤冰已失

國士意頗為年少陵長歌獨慷慨坐候東方升

秋懷

露下百草變淒淒天地秋亦如中年客玉顏安可留山
鳴迅商激水涸行潦收思方改團扇意復存散裴梧桐
葉盡脫孤雛夜啾啾光景忽已逝感之雙涕流

擬古

荆山一何高上與天門通猶聞產玉處吐氣成白虹懸
藜混燕石世已無國工琢之懼不完不如在石中卞和

恥再別玉亦悲無窮吾今久抱璞庶以全其躬

四月十日兒子翩翩來鳳陽留一月遣歸因令
早營草堂及山下為止息之所云

老病不得歸獨處長戚戚二子江南來眼暗初未識生
常戒垂堂肌肉如雪白一月長途間海風吹盡黑買酒
為相勞問答向中夕迢迢漢陽簿春來斷消息阿宣在
母旁頗知工翰墨艱難且撥棄頓使沈憂釋所媿無定
居百歲半為客經營須及早尚愛龍湫僻況近讀書臺

雲銷四山碧泉深出丹砂地冷多琥珀既非佳世資庶
遂陶阮逸良辰戒僮僕匆匆又南北五月方鬱蒸日氣
成霞赤出入非所宜川陸慎所歷惜別豈無淚向汝難
再滴秋江有鱸魚當挂吳淞席

朱右

遺安軒雜詠

林屋小如舟老鶴長似人昂藏立清曉起舞玄羽新高
標凜寒骨羈孤向霜晨從來青田姿踟躕離風塵俛首

謝軒車不與雞鶩馴

遣興

幽徑何偏側蔓草沒行路此生苦不辰出門畏多露遲
回蒙山居仿像商顏步藉藉春花萎冉冉芳年度寄語
素心人朱顏恐非故

張宣

與慈邑諸公會宿茅甫生駐鶴樓得夜字

白水冒平田積陰過初夏風雨招友生琴樽相慰藉飛

金剛經
卷十八
梯倚孤撐連峯競迴迓晦冥巖壑變空翠林木亞疎煙
截山椒微月露天罅僧鐘隔遠寺漁火候歸舍鶴影渚
雲迷風聲澗泉罷投迹山水邦脫身紛俗駕久忘簪組
累不待休沐暇飲酣心為壯時危氣逾下佳會不再期
茲遊偶來乍鷄鳴起營營莫忘永清夜

九日偕張思廉楊孟載徐二岳登虎丘

招提憑崇岡石壁根空虛躋攀陟層巔歷覽壞劫餘清
商振穹昊爽氣棲平蕪雲消初旭吐木落遙峰孤幽潭

積水深修綆斷轆轤光欲飛騰神物今有無空令弔
古人解笑英雄愚撫茲良辰及感我芳情紆長揖當塗
者永與山林俱

邵亨貞

送傅子初先生之信州錄事

去年十月交冬淺寒輒涖客居江城館燈火在風露君
從錢唐來舍舟縱游步一見心為開問勞出情素番陽
與雲間相望千里路會合非偶然況是夙所慕江左古

世家粲粲美風度射策衣繡歸春生五陵樹文章天機
錦到手眩昏瞶坐談極疇曩歡然獲知遇自冬更徂春
不間朝夕晤君於稠人中走獨心所寓傳舍稍密邇泥
寧亦枉顧開卷析疑義沛然決東注賞音風雅間神會
見天趣平生耿耿懷不為流俗具因君頗呈豁欣快未
易喻誓將與此老結納視親故款洽豈有極忽復報爪
戍錄曹雖民職未足展抱負行者崇令德政化藹先務
分違坐契濶引領不可遡中年別親友作惡若深忤梅

風彭蠡寬歸鷁慎速渡後約仍綢繆中情尚能賦芳洲
蹇誰留懷哉美人暮

沙湖

凌晨出沙湖杲杲寒日赤望路指西南趁風挂帆席行
行數里間舟底盡沙磧歲暮寒水落過者總煩劇篙師
力支撐進寸乃退尺叫呼問鄰舟始得指所適中流植
荻葦表以深水迹由茲遂無阻四望始充斥迢遞達岸
旁回首日已夕嗟予匪徒行哀謝牽物役人生苦多虞

金夕日 卷十八
仰羨投林翮

錢宰

擬古

庭樹日已黃白髮日已短
候蟲鳴前除秋霜蕙花晚
歲月如奔駒六轡不可挽
泛舟涉方瀛方瀛水清淺
安期邈難求吾棹亦已返
花開醉復斟黍熟飢自飯
適然樂悟生瑤島諒不遠

泛舟新湖塘次王敬助韻二首

清賞各有適何異同登攀君舟泊西隩我車上東山林
光變宿雨溪響洄晴瀾春深飛花歇日入好鳥還佳景
欣所得毋令清興殘俯首縱壑魚仰見培風翰物理固
有待努力當希顏胡為念窮達戚戚天壤間

湖水日已綠理棹不可緩雜花當晝翻遠樹出雲短沙
明宿雨霽風急游絲斷悠悠歡賞深歷歷佳趣滿酒盡
客愁生歌殘離思遠世路方險巇窮居正蕭散出處諒
何心夕陽起樵管

城南燕集得作字

閉門度芳辰念此風雨惡今日忽復晴青郊縱行樂引
杖聽鶯啼持杯看花落庭綠樹陰交春容已非昨微酣
愛酒清放歌悲髮白茫茫師旅間擾擾煙塵隔夙昔愧
棲遲于今喜離索明朝溪上田買牛事東作

白野太守游賀監故居得水字

崇岡散新陽寒日舒短晷晴飈一披拂波影上沙尾意
行遂忘疲情語相慰喜賜宅知已非歸舟更誰艤樹暗

山始夕川明月初至停杯成慨歎
覓句聊徙倚前林樵
唱來驚鴻下寒水

擬古

行行重行行

出門萬里別行行遠防邊相望各天末
北斗日夜躔四
運秋復春不見君子還燕車北其轍越馬南其轅日遠
心愈近悵望徒懸懸黃雲暗關塞路險不見天式微夫
如何日月忽已遷願言崇明德無為終棄捐

西北有高樓

高臺何巍巍參差與雲平
玉繩臨雙闕長河流無聲
上有羽衣人逍遙吹玉笙
清響涵明月飛佩何泠泠
借問弄者誰疑是董雙成
逸思隨風發無人識其聲
曲終再三歎感慨有餘情
所悲同門友局促趨世榮
願將秋水劍為之解塵纓
笑呼雙黃鵠與子俱遠征

明月皎夜光

皎皎明月光照我屋東
頭寒螿鳴樹間招搖指
孟秋白

露下高梧落葉聲颼颼寒溫更變遷河漢東南流懷哉
里中兒奮志起遠遊飄然遡長風垂槎犯斗牛支機織
女石為問今在不水深波濤濶浮名將焉求

庭中有奇樹

中林多幽蘭江蘼雜芳蓀采之酌春酒將以清心魂持
杯未及飲悵然念王孫王孫不歸來置酒在芳尊

迢迢牽牛星


河東有織女皎皎雲為章手弄機上絲日夕更七襄織

成五色文欲製君子裳莫言隔秋水可以駕飛梁
睨彼牽牛星終日不服箱

客從遠方來

萬里別海水日夜深南風海上來遺我雙南金
不見故人面乃見故人心鑄作黃金徽置之白玉琴
彈為別鶴操間以懷湘吟曲終聽者稀矯首望知音

御選明詩卷十八



總校官庶吉士臣侍朝

校對官檢討臣蕭九成

謄錄舉人臣傅瓌芳